

Anton, den Bessenbinder

Et es all lange Johren her,
so sesteg, söwenteg on noch mehr
dor huhsten bej ons in en Zigeunerwagen
en Bessenbender met sin Wiw on Blagen.
Dat wor öm de Wagen heröm en Gekrabbel
on met die Blagen en gekrah on Gebabbel.
Wenn die omes all gungen schlophen,
dann es eenen öwer den andern gekropen.
Anton, so hidden den Bessenbender,
wor arm, ewer glöcklech met sin Wiw on tihn Kender.

Anton on sin Wiw Antonia woren nit van hier, die komen van gönt Sit, van de Bönnenghard, sovöl ek noch wet. Sej woren all öwerall heröm getrocken met öhren Zigeunerwagen. De este Tit hadden sej noch en Perd vör de Wagen spannen können ewer dat arme Dier, son mageren, alden Klepper wor kapott gegohn. Seit ennege Johren stohn de Wagen in Bruckhusen bej en Bur ob de Wej, dor wor de Bruckhuser Leijgraw an den Bosch verbej löp. Anton on sin Wiw woren met alles defrejen. Die Blagen woren gesunde Knüs on et wor för allemol noch ömmer genug de eten dor gewess. Alle Blagen woren inne Zigeunerwagen ob de Welt gekommen on roh on blot obgetrocken. Anton gung dagsöwer inne Bösch öm Brömmen on Heister¹ de süken für de Bessems. Die Wejen² för de Bessems de benen, sükten heij in't Bruk. Wenn heij en Potsion Bessems gemak hat, trok heij dormet ob de Schufkarr no Denslaken. Dor mossen die Läj inne Stadt joa die Stroten fegen. Wenn et gut ging hat heij well tihn Mark doför gekregen. En paar Schoppen Schnaps, för sech on Antonia on en Tut met Babeltjes för de Blagen sot ewer dran. Et wör ewer für de ganzen Tropp blos bej drög Brot geblewen, wenn Anton met sinne Familje van et Bessenbenden hät lewen

mödden. Bei den Bur, wor sinne Wagen ob de Weij stohn, dej Anton inne Sommer ob et Feld on inne Wenter innen Bosch arbeijen. För en Daler den Dag, van morges fruch böses omes lat on för en schroh³ Eten moß et ma gohn. Kapott arbeijen dej Anton sech bestemmt nit. Bei et Ärpelengrawen kom heij met die andern nit öwer. Heij klöngelden heröm wor heij ma kos. Enmol hat heij die Klumpen voll Erd, dann wor die Ärpelgrob los anne Stell oder heij moss üt de Bocks in den Bosch. Doför wor heij ewer gau debeij wenn die Bursfrau met de Botterrammen on de Koffi kom. En Botterramm met Speck on en paar met Wottelekrut⁴ on Muckfuck met magere Melk dat wor all wat. Anton on sinne ganze Familje komet ewer noch ob andere Wis derech. Die Blagen stibitzten bei de Buren Appeln on Pären on wenn et düster wor, die Ärpelen van't Feld. Anton sörgten doför, dat af on tu en Karnekel oder en Haas inne Pann brojden. Enmol hat öm de Förster bei et Schlengenstellen trappiert on scheckten öm de Schandärm ob den Hals. Et kom ewer necks devan no. De Schandärm dat wor noch en jonge Kerl on Anton sinne ölste Dern die hat en Figürken, dor wor alles dran. Wie den Schandärm in de Wagen no die Schlengen süken dej, wor die Dern alleen met öm on heij mot well inne Schlang gerojen sin. So klöngeleg Anton bei et Arbeijen wor, so flitteg wor heij bei sin Wiw. Bald jedes Johr en Blag. Enes gujen Dages sät Anton tegen öhr: „So kann et nit wier gohn, ek schlop nit mehr bei dej, van morgen an schlop ek bei den Bur on den Höjbalken.“ Antonia sät dorop: „Wenn ek wös, dat dat helpen dej, schliep ek met dej ok ob den Höjbalken.“

Hermann Schneider, Buchholtwelmen

¹ Heister = Birkenreiser, ² Wejen = Weidenzweige, ³ schroh = schmales,

⁴ Wottelkrut = Möhrensirup